

Allannguutissatut siunnersuut  
uunga tunngasoq

**Siunnersuut uunga: Aatsitassat pillugit ingerlatallu tamatumunnga pingaarutillit  
pillugit Inatsisartut inatsisaat nr. xx , ulloq xx 2009-meersoq (aatsitassanut  
ikummatisanullu inatsit)**

Aappassaanneerininnissamut Naalakkersuisunit saqqummiunneqartoq.

**1. § 3, imm. 2, imatut oqaasertalerneqassaaq:**

“ *Imm. 2. Annikitsuinnarmik misissuinissamut aamma piaanissamut akuersissut, § 16, imm. 3 apeqquatainnagu, inunnut Kalaallit Nunaanni najugaqavissunut tamakkiisumillu akileraartussaatitaasunut aammalu Kalaallit Nunaanni ukiuni tallimani inuit allattorsimaffianni nalunaarsorsimallutik najugaqareersimasunut aamma Kalaallit Nunaanni ukiuni tallimani tamakkiisumik akileraartussaatitaareersimasunut taamaallaat tunniunneqarsinnaapput.*”

**2. § 32, imm. 2, kingorna imm. 3-itut nutaatut ilanngunneqassaaq:**

“ *Imm. 3. Naalakkersuisut imm. 2-imi ukiuni tallimani inuit nalunaarsorsimaffianni nalunaarsorsimalluni najugaqareersimanissaq aamma Kalaallit Nunaanni ukiuni tallimani tamakkiisumik akileraartussaatitaareersimanissaq pillugu piumasaqaatit saneqqussinnaavaat, qinnuteqartup Kalaallit Nunaannut attaveqarnera aallaavigalugu tamanna naapertuuttutut nalilerneqarpat, aammalu qinnuteqartoq ilinniarnini assigisaaluunniit pissutigalugu Kalaallit Nunaata avataaniissimappat.*”

**3. § 38, imm. 2, oqaaseqatigiit siulliit ima allanneqassapput:**

” *Imm. 2. Imm. 1-imi malittarisassat atuutsinneqalissanngillat akuersissutaateqartup kisermaassisussaatitaanngitsulli aatsitassat annikitsuinnarnik nalillit piiarniarpagit.*

**4. § 42, imm. 2, oqaaseqatigiit siulliit ima allanneqassapput:**

” *Imm. 2. Naalakkersuisut §§ 43 aamma 86 naapertorlugit akuersissuteqarnerminni imm. 1 malillugu pisinnaatitsisummiq pigisaqartup pisussaaffiinik naammassinninnissamut qularnaarisussanik atugassarititaasussanik aalajangersaasinnaapput, ilanngullugu qularnaveeqqusiqineq.*”

**5. § 45, ima oqaasertalerneqassaaq:**

” **§ 45.** Inuk Kalaallit Nunaanni aalajangersimasumik najugaqartoq tamakkiisumillu akileraartussaatitaasoq, akuersissummiq peqarnissamik piumasaqarfingineqarnani, inuussutissarsiutiginagu ujaqqanik kaanngarsimasunik katersisinnaavoq.

*Imm. 2.* Imm. 1 malillugu katersineq sumiiffinni § 16 imaluunniit § 33 malillugit akuersissuteqarfiusuni ingerlanneqassanngilaq, taamaallaallu § 39 malillugu nunap iluani ingerlataqarnissamut akuersissutit ataqqillugit ingerlanneqarsinnaalluni.

*Imm. 3.* Aatsitassat imm. 1 malillugu katarsorneqartut tuniniarnissaat imaluunniit tuninissaat siunertaralugu suliareqqinnissaat kissaatigineqarpat, kapitali 8-mi malittarisassat malillugit sumiiffimmut aatsitassanik piiaaffiusumut aatsitassanik annikitsumik piiaanissamut akuersisummik qinnuteqartoqarsinnaavoq.

*Imm. 4.* Inuit § 33 malillugu akuersisummik tunineqarsimasut, Kalaallit Nunaata nunataata sananeqaataa pillugu nittarsaanissaq siunertaralugu Naalakkersuisunit akuerineqareerlutik takornarianut assigisaannullu takornariartitsinermik aaqqissuussisinnaapput. Taamatut sammisaqarnissaq pillugu Naalakkersuisut erseqqinnerusumik malittarisassiuussisinnaapput.

*Imm. 5.* Inuit Kalaallit Nunaanni aalajangersimasumik najugaqanngitsut tamakkiisumillu akileraartussaatitaanngitsut ujaqqanik kaanngarsimasunik katersisinnaanerat taakkuninngalu Kalaallit Nunaannit aallarussisinnaanerat pillugu Naalakkersuisut erseqqinnerusumik malittarisassiuussisinnaapput.”

## **Nassuaatit nalinginnaasut**

Inatsisit atortinneqarnerannut Ataatsimiititaliap siunnersuummik suliarinninnaera malitseqartillugu allannguutissatut siunnersuut saqqummiunneqarpoq. Akuersissummik tunineqarsimanani aningaasarsiutigalugu ukiumut 100.000 kr.-it angullugit naleqartunik aatsitassanik piaanissamut atatillugu nakkutilliisarnissaq misissuisarnissarlu ajornartorsiutaasinnaasut Inuit Ataqatigiit uparuarpaat. Siumup oqaaseqartuata, aatsitassarsiornermi aningaasarsiutigalugu ingerlatat tamaasa nakkutigineqarsinnaanerat pingaaruteqartoq oqaatigaa, siunnersuutigalugulu aatsitassat akuersissummik peqarnani piarieqarsinnaasut nalingisa annertunerpaaffissaat 50.000 kr.-nut appartinneqassasoq. Allannguutissatut siunnersuummi aamma Inatsisit atortinneqarnerannut Ataatsimiititaliap isumaliutissiissutaa, annikitsuinnarmik aatsitassarsiornissamut akuersissutit tunniunneqarnerannut atatillugu najukkamut akileraartarnermullu tunngatillugu piumasaqaatit sukannererulersinneqarnissaat eqqarsaatigalugu akuersaardeqarpoq.

§ 45-mut allannguutissatut siunnersuutip pingarnertut siunertaraa inuussutissarsiutiginagu aamma inuussutissarsiutigalugu aatsitassanik ingerlataqarnissap killingisa erseqqissaatigineqarnissaat. Allannguutissatut siunnersuut malillugu inuussutissarsiutigalugu aatsitassanik piaanerit tamarmik akuersissuteqarfigineqaqqaartarnissaannik piumasaqarfigineqartalissapput, taamaattumillu aatsitassanik annikitsumik misissuinissaq piaanissarlu pilligit inatsisissatut siunnersuummi kapitali 8-mi malittarisassanut ilaatinneqartariaqarlutik.

Allannguutissatut siunnersuutip sanalunnermut atatillugu aatsitassanik piaanerit taamaattut taakkualu atorlugit sanalukkat takornarianut tuniniarneqartarnerat ingerlatsinikkut nakkutigineqarnerissa pisariinnerulernissaat kingunerisussaavaa, kiisalu tamatumunnga atatillugu ujaqqanik erlinnartunik piaanerup tuniniaanerullu nakkutigineqarnerata pitsaunerusumik ingerllanneqalernissaata periarfissarissaarnerulernissaat kingunerisussaallugu.

Allannguutissatut siunnersuut allaffissornikkut imaluunniit aningaasatigut Namminersorlutik Oqartussanut allatigut sunniuteqassanngilaq.

## **Aalajangersakkanut ataasiakkaanut nassuaatit**

Nr. 1-imut

Annikitsuinnarmik aatsitassarsiorluni misissuineq aamma piaaneq pilligit kapitali 8-imik aalajangersakkat, innuttaasut nunaqavissut aatsitassarsiornermiik sammisaqarsinnaanermut pisariitsumik periarfissaqarnissaannik qularnaarisussaapput. Periarfissami taassani unioqqutitsinissaq atornerluinissarlu pinngitsoorniarlugit, piniarnermut aalisarnermullu inatsimmituulli ukiuni tallimani Kalaallit Nunaanni inuit allattorsimaffianni nalunaarsorsimasumik najugaqareersimanissat tamakkiisumillu akileraartussaatitaareersimanissaq pillugu piumasaqaatit aalajangersarneqarput.

Nr. 2-imut

Aalajangersakkami Naalakkersuisut qinnuteqartup ataatsimut isigalugu Kalaallit Nunaannut

aalajangersimasumik atassuteqarneranik naliliineq aallaavigalugu, ukiuni tallimani Kalaallit Nunaanni najugaqareersimanissamik tamakkiisumillu akileraartussaatitaareersimanissamik piumasaqaammik saneqqutsisinnaanerannik periarfissinnejarpuit. Ukiuni tallimani Kalaallit Nunaanni najugaqareersimanissamik tamakkiisumillu akileraartussaatitaareersimanissamik piumasaqaammik saneqqutsinissamik periarfissaqarneq, pingartumik qinnuteqartunut Kalaallit Nunaata avataani ilinniartuuusimasunut, sulinermik sungiusarsimasunut assigisaannilluunniit pissuteqartunut atatillugu atorneqarnissaa eqqarsaatigineqarpoq.

Nr. 3-imut

Allannguut taamaallaat teknikkimut tunngavoq, Inatsisit atortinneqarnerannut Ataatsimiititaliap innersuussinera naapertorlugu oqaasertaq pisariaqanngitsoq peerneqarmat.

Nr. 4-mut

Allannguut Inatsisit atortinneqarnerannut Ataatsimiititaliap suliaqarnerata inerneraa, tassanilu siunnersummi § 86 malillugu misissueqqaarnermik misissuinermillu ingerlataqarnerit akuersissuteqarfigineqarnerannut atatillugu, suliaqarnerit naammassineranni illuutinik, sanaartukkanik atortulersuutinillu ikkussukkanik ilaalu ilanngullugit sumiiffiup akuersissummi ilaatinneqartup iluani avataanilu inisisimasunik piiaanissamut pisinnaatitsisummik pigisaqartup pisussaaffiinut qularnaveeqqusiiqarneq pillugu atugassarititaasussanik aalajangersaasoqarsinnaasoq erseqqissarnissaa siunertarineqarpoq.

Nr. 5-imut

§ 45, imm. 1-imut

Aatsitassarsiornermik ingerlataqarnerit aatsaat akuersissut Naalakkersuisunit tunniunneqarsimasoq naapertorlugu pisarnissaannik piumasaqaammi, aatsitassanik kaanngarsimasunik inuussutissarsiutiginagu katersisarneq kisimi ilaatinneqanngitsoq aalajangersakkami aalajangersarneqarpoq. Inuussutissarsiutiginagu aatsitassanik katersinerup ilisarnaatigaa, annertussusiisa nalingisalu annikinnerat, aatsitassallu tunineqartussaanatik imaluunniit tuniniarnissaat siunertaralugu suliarinissaannut ilaamatik, taamaallaalli nammineq atugassatut atorneqassallutik, assersuutigalugu sunngiffimmi aliikkutaralugu ujaqqanik katersineq. Akerlianik tunisassiornissaq siunertaralugu aatsitassanik katersineq imaluunniit tuniniaqqitassanik aatsitassanik piiaaneq imaluunniit inuussutissarsiutigalugu aatsitassanik katersineq, inuussutissarsiutigalugu aatsitassanik piiaanertut paasineqassaaq.

Namminersorlutik Oqartussat suliassaqarfimmik tigusineranni, atortussiassanik aatsitassanit pisunik nunap inoqqaavisa katersinissamut piiaanissamullu periarfissaqarnissaat pillugu immikkut maleruagassaqarnissaq pisariaaruppoq. Namminersorlutik Oqartussat Kalaallit Nunaanni atortussiassat aatsitassanit pisut ilaalu ilanngullugit pigisarinissaannut piichernissaannullu piginnittussaatitaapput. Aatsitassanut suliassaqarfimmik tigusinerimi siunertarineqarpoq Kalaalit Nunaanni innuttaasut tamarmik, suliaqarnerit suliassaqarfimmik inatsisitigut maleruagassat naapertorlugin ingerlanneqartut, sapinngisamik annertunerpaamik iluaqtigissagaat.

Aalajangersagaq taamaallaat aningaasarsiutiginagu piiaanissamut atuuppoq. Aatsitassanik aningaasarsiutigalugu piiaanissaq kissaatigigaanni tamatumunnga akuersissummik qinnuteqartoqartussaavoq. Taamaalilluni piiaaneq Namminersorlutik Oqartussat maleruagassat aalajangersagaat malillugu ingerlanneqarnissaat, nalingisalu sapinngisamik

ataatsimut isigalugu inuiaqatigiinnut tutsinneqartarnissaat qulakkeerneqassaaq.

Aalajangersakkap kapitali 8-mi aalajangersakkat peqatigalugit aatsitassanik annikitsumik misissuinissaq piiaanissarlu pillugit aatsitassanut inatsimmi atuuttumi § 32-mi aalajangersakkat taarserpai, tassani ima allassimagami:

*"Kalaallit Nunaanni innuttaasut najugaqavissut manna tikillugu inatsit manna malillugu immikkut akuersissuteqarnissamik pisariaqartitsinatik aatsitassanik katersisinnappa put piiaasinnallaillutillu."*

*Imm. 2. Imm. 1-im aatsitassanik katersinissamut piiaanissamullu periarfissatut atatiinnagaq, aatsitassanik piiaanissamut kisremaassilluni akuersissut inatsit manna malillugu allanut tunniunneqarsimasoq ataqqillugu taamaallaat ingerlanneqarsinnaavoq.*

*Imm. 3. Kommunalbestyrelsi kommunip iluani imm. 1 malillugu aatsitassanik katersinissaq piiaanissarlu pillugit erseqqinnerusunik aalajangersasinnaavoq."*

Aatsitassanut inatsimmi atuuttumi § 2-mi aalajangerneqarpoq Kalaallit Nunaanni aatsitassanik misissueqqissaarneq, misissuineq piiaanerlu taamaallaat inatsisini malittarisassat malillugit akuersissut tunniunneqarsimasoq malillugu pisinnaasut.

§ 32-p oqaasertalersorneqarnerani ima allanneqarpoq (Folketingstidende 1990-1991, 2. samling, Tillæg A, ammukartoq 5993):

*"Aalajangersagaq imarisamigut aatsitassanut inatsisip atuuttup § 30-at assigaa."*

Aatsitassanut inatsisip 1978-imeersup oqaasertalersorneqarnerani aalajangerneqarpoq, aalajangersakkap periutsip atatiinnarnissaa siunertarigaa, aatsitassanut inatsimmi 1965-imeersumi § 1, imm. 2-mi tunngaviusup tunuliaquataa ineriertortinnejarsimalluni. Tamatuma nassatarisimavaa, aatsitassanik katersinerit piiaanerillu ilaat pillugit immikkut akuersissuteqarnissaq pisariaqanngitsoq.

Aatsitassanut inatsisip 1978-imeersup oqaasertalersorneqarnerani inatsisissatut siunnersuutip § 30-anut nassuaatini makku ilanngunneqarput, taannalu aatsitassanut inatsimmi 1991-imeersumi § 32-ani aalajangersakkap imarisamigut assigisa:

*"Siunnersuutip § 30-an siunertaavoq periutsip atatiinnarnissaa, inatsimmi atuuttumi § 1, imm. 2-mi tunngaviusup tunuliaquataa ineriertortinnejarsimalluni, immikkut akuersissuteqarnissamik pisariaqartitsinani aatsitassanik katersinerit piiaanerillu ilaat eqqarsaatigalugit. Aalajangersagassatut siunnersuummi manna tikillugu pineqarput ujaqqanik pinnersaatisanik (ujaqqat erlinnartut nalikinnerit) assigisaallu assessorluni suliarinninnisanut tunngaviusussat kiisalu aatsitassat sanaartornermut atortussat imaluunniit kiassarnermut siunertallit assigisaallu: Katersinerit manna tikillugu ingerlataqartunut killeqartinneqassaaq, suliffissuarni tunisassiorernernut eqqaanartuunngitsut, amerlasuunillu tamatumunnga atatillugu aningaasalersuiffissaanngitsut, tak. tamatumunnga § 1-im oqaaseqaatit..."*

Aalajangersagaq malillugu katersisarnerup suunera oqaasertalersuinerni periuseq nassuarneqarpoq, katersisarneq maannakkut pisartutut ingerlatanut killilerneqartoq tunisassiornertut isikkoqanngitsunut, tamatumunngalu atatillugu amerlanerusunik aningaasaliisoqartussaanani.

Aatsitassanut inatsimmi atuuttumi § 32, imm. 2-mi alassimavoq, imm. 1 malillugu aatsitassanik katersisinhaaneq piaasinnaanerlu, aatsitassanut inatsit malillugu akuersissutinik taamaattunik tunniussisoqarsimappat, allat aatsitassanik piaanissamut kisermaassilluni akuersissuteqarfigisaat ataqqillugit taamaallaat pisinnaasoq. Sumiiffik piaanissamut akuersissuteqarfinnut ilaappat, aalajangersimasumik najugallit imm. 1 malillugu katersisinhaatitaanerat piaasinnaatitaanerallu sumiiffiup iluani pisinnaajunnaassaaq, aatsitassat akuersissuteqarfiusunut ilaasut eqqarsaatigalugit. Aalajangersakkap oqaasertalersorneqarnera malillugu tamatumunnga assersutigalugu ilaavoq innuttaasut sumiiffimmi aamarsuarnik katersisinhaanerat, aamarsuarnik piaanissamut kisermaassilluni akuersisummik tunniussiffingeqarsimasumi.

Siunnersummi § 45-mi aalajangersagaq annikitsumik aatsitassarsiorluni misissuineq piaanerlu pillugit kapitali 8-immi aalajangersagaq peqatigalugu, kalaallit innuttaasut aatsitassanik katersisinhaanerannik ingerlatitseqqinneruvoq erseqqissaanerullunilu. Inuit akuersisummik peqaratik aatsitassanik katerserusuttut piaarusutullu, Kalaallit Nunaanni aalajangersimasumik najugaqartussaapput tamakkiisumillu akileraartussaatitaassallutik.

#### § 45, imm. 2-mut

Aalajangersakkami aatsitassanut inatsisimmi maannakkut atuuttumi § 32, imm. 2 ingerlateqqinneqarpoq.

Aalajangersakkami erseqqissaatigineqarpoq imm. 1 malillugu katersineq inatsit manna malillugu misissuinissamut akuersissutit aamma piaanissamut akuersissutit tunniunneqarsimasut allat ataqqillugit taamaallaat ingerlanneqassasoq.

Aalajangersakkami alassimavoq, aatsitassanik katersisinhaaneq taamaallaat pisinnaasoq, allat aatsitassanik piaanissamut kisermaassilluni akuersissuteqarfigisaat ataqqillugit, aatsitassanut inatsit malillugu akuersissutinik taamaattunik tunniussisoqarsimappat.

Sumiiffik piaanissamut akuersissuteqarfimmuit ilaappat, aalajangersimasumik najugallit imm. 1 malillugu katersisinhaatitaanerat sumiiffiup iluani pisinnaajunnaassaaq.

#### § 45, imm. 3-mut

Aalajangersakkami pineqarput aatsitassanik imm. 1 malillugu inuussutissarsiatiginagu katersorneqarsimasunik aatsitassanik annikitsumik piaanissamut inuit qinnuteqarsinnaanerat.

Aatsitassanut inatsit atuuttoq malillugu assinganik atuuppoq, inuk annikitsumik ingerlataqarnissamut akuersisummik qinnuteqarsinnaasoq, aatsitassanik misissuinermi piaanermillu ingerlatsineq § 32-mi ilanngunneqarsimasut sipporlugit annertussuseqarpat siunertaqarpallu.

Annikitsumik ingerlatsinissamut akuersissut taamaallaat tunniunneqarsinnaavoq, qinnuteqartup aatsitassat sumi aamma qanoq katersuisimanini, aamma piaaneq imm. 1 aamma 2 malillugit ingerlanneqarsimasoq upernarsarsinnaappagu.

#### § 45, imm. 4-mut

Aalajangersagaq nutaaajuvoq, takornariartitsinermillu inuussutissarsiornermut tunngasuulluni.

Aalajangersagaq periarfissiivoq, inuit § 33 malillugu annikitsumik ingerlatsinissamut akuersisummik tunineqarsimasut takornarianik takornariartitsinermik aaqqissuussisinnaasut,

ilanngullugu takornariat ujaqqanik katersisinnaanerannik periarfissillugit. Aalajangersakkami erseqqissaatigineqarpoq, ataatsimut isigalugu Naalakkersuisut akuersisimanissaat pisariaqartoq, tamatumunngalu atatillugu takornariartitsisoqarluni ujaqqanik sammisaqarluni angalaartitsinernik sammisaqarnerit pillugit ataatsimut isiginntumik Naalakkersuisut piumasaqaatinik aalajangersaasinnaapput.

Taamatuttaaq aalajangersakkami erseqqissaatigineqarpoq, sammisaqarnerit pillugit Naalakkersuisut erseqqinnerusumik malittarisassiuussisinnaasut.

§ 45, imm. 5-imut

Aporfissat nalinginnaasut iluarsinissaat aalajangersakkap siunertaraa, tassalu takornariat Kalaallit Nunaannullu tikeraartut ujaqqamik arlalinnilluunniit tammajuitsussatut Kalaallillu Nunaannut eqqaassutissaminnik aallarussuinissaminnik annertuumik kissaateqartarnerat. Taamatut katersisarnerit aningaasarsiornissamik soqtigisaqarnermik tunngaveqanngitsut, kiisalu Kalaallit Nunaannit nalilinnik annissuiffiunngitsut, nalunaarummi maleruagassiornissaat siunnersuutigineqarpoq, tassani Naalakkersuisut erseqqinnerusumik aalajangersaasinnaallutik, ilanngullugit annikinnerpaaffissat pillugit malittarisassat. Aalajangersakkap nalunaarusiornermut atorneqarnissaa tunngavigineqarpoq, tassani maleruagassiorneqassaluni ujaqqanik aningaasarsiutigalugu naleqanngitsunik katersisinnaanermik periarfissiinissaq, ilanngullugu sumiiffit, oqimaassusissat ilaalu ilanngullugit, suliassaqarfimmik aqutsinissamik oqilisaataasussat.